



UKA 2013/127  
01. oktober 2013  
Sara Olsvig

**Kalaallit Nunaata Extractive Industries Transparency Initiative-mi (EITI) candidate/compliant country status-eqarluni ilaasortanngorsinnaaneranut periarfissat pillugit Naalakkersuisut naalagaaffimmut attaveqaqqullugit peqquneqarnissaannik Inatsisartut aalajangiiffisassaattut siunnersuut.**  
(Inatsisartunut ilaasortaq Doris Jakobsen, Siumut)

Qularutigineqanngilaq ingerlaavartumik qulakkeertuarniartariaqassagatsigu aatsitassarsiorfeqarnerput suliffissuaqarfeqarnerpullu sutigut tamatigut paasiuminartumik, erseqqissumik, ammasumillu tamallu oqartussaaqataaneratigut akisussaassuseqartumik ingerlanneqarnissaa.

Tamanna suliniutini tamani aningaasanik ingerlaartitsinermut aammalu ingerlatseqatigiiffinnut aningaasaliisartunullu nalinginnaasumik ingerlatsinermut tunngavoq. Inuit Ataqatigiinnit akuersaarnartuutipparput tamanna Inatsisartuni partiit allat aamma pingaartitami akornanniitimmassuk.

Taamaammat Kalaallit Nunaata Extractive Industries Transparency Initiative-mi (EITI) qanoq inissisimalernissaanut periarfissat qulaajarneqarnissaat pillugu Naalakkersuisut danskit naalagaaffiannik attaveqaqqullugit siunnersuutigineqartoq ilalerparput.

Naatsorsuutilli tamakkiisut EITI-mi nakkutigineqarneq ajorput ingerlatseqatigiiffissuarnillu nakkutilliinissamut periarfissatuaanani.

EU-mi Europaparlamentip naatsorsuutitut malitassiaq nutaaq akuerisimavaa ingerlatseqatigiiffiit naatsorsuutaasa tamakkiisut saqqummersinneqartarnissaannik aammalu ilaatigut nunakkaartumik nalunaaruteqartarnikkut nakkutigineqartarnissaannik qulakkeerinniffiusumik.

EU-p naatsorsuutitut malitassiaa Folketingimit atortuulersinneqarlunilu akuersissutigineqareerpat, danskit ukiumut naatsorsuusiortarneq pillugu inatsisaata Kunngip

peqquusineratigut Kalaallit Nunaanni aamma atuutilersinneqarsinnaanissaa siunertaralugu Naalakkersuisut naalagaaffimmut saaffiginnissuteqaqqullugit upernaaru Inatsisartut aalajangiiffigisassaattut Inuit Ataqatigiinnit siunnersuuteqassaagut.

Nunakkaartumik nalunaaruteqartarnek isumaqarpoq suliffeqarfiit nunani arlarlinni ingerlataqartut, tamatumunnga ilagitinneqarlutik suliffeqarfissuit nunani tamalaani ingerlatsiveqartitertut, nunani ataasiakkaani ingerlatsivigisaqarfigisaminnit naatsorsuutit pillugit paasissutissiisarnissaq pisussaaffigilermassuk. Pinngortitap pisuussutaanik suliffeqarfiit atuisinnaatitaanerminnut atatillugu aningaasanik nunamit nunamut ingerlaartitsinerat saqqumisuussasoq ilaatigut malitassioortitsinikkut anguniarneqarpoq.

Inuit Ataqatigiinnut pingaarnerpaajunngilaq nalunaaruteqartarnermut nakkutilliisarnermullu tunngatillugu aqqissuussinerup EITI-tut allatulluunniit taaguuteqarnissaa. Uagutsinnut pingaarnerpaajuvoq nunami maani suliffissuaqarfeqarnermut aatsitassarsiorfeqarnermullu atatillugu tamakkiinerpaamik nalunaaruteqartoqartarnissaa aammalu nakkutilliisoqartarnissaa Kalaallit Nunaata ilalissagaa. Taamatuttaaq uagutsinnut pingaaruteqarpoq marloqiusamik nalunaaruteqartoqartarnerup sapinngisamik minnerpaaffianiitinniartarnissaa, tassami nalunaaruteqartarnerit suulluunniit allaffissornikkut pisarissersuutaasarmata.

Taamaammat EITI-p iluani periarfissat qulaajarneqarnissaannik danskit naalagaaffiannut attaveqaqqusinnissamik siunnersuut tapersorsorparput ilutigisaanillu Inatsisartuni partiit sinneri kaammattorusuppavut EU-p naatsorsuutitut malitassiaata nutaap iluani periarfissat ilanngullugit misissueqqusinermik siunnersuuterput ilaleqqullugu, taamaasilluta ataatsimut isiginnilluta periarfissat assigiinngitsut aammalu nalunaaruteqartarnermi nakkutilliinermilu aqqissuussinerit pitsaanerpaat ilannguffigisinnaaqqullugit.